

經傳釋詞

增刊誤表

經傳釋詞序

經傳中實字易訓虛詞難釋顏氏家訓雖有音辭篇于古訓罕有發明賴爾雅

說文二書解說古聖賢經傳之詞氣最爲近古然說文惟解特造之字如亏而

不及假借之字如而爾雅所釋未全讀者多誤是以但知攸訓所而不知同迪

攸與由同由迪古音相轉迪音當如源滌之从攸笛但見言訓我而忘其訓閒

爾雅言閒也雖以毛鄭之精猶多誤解何況其餘高郵王氏喬梓貫通經訓兼

及詞氣昔聆其終風諸說每爲解頤乃勸伯申勒成一書今二十年伯申侍郎

始刻成釋詞十卷元讀之恨不能起毛孔鄭諸儒而共證此快論也元昔教浙

士解經曾謂爾雅坎律銓也爲畝聿詮也字之訛辛楣先生踴之又謂詩鮮民

之生書惠鮮鰥寡鮮皆斯之假借字詩綢直如髮如當解爲而髮乃實指其髮與笠同非比語

傳箋老子夫佳兵者不祥之器佳爲佳同之訛老子夫佳惟二字相連爲辭者甚

不當若此之疇學者執是書以求之當不悖謬於經傳矣論語日出辭氣斯遠

鄙倍可見古人甚重詞氣何況絕代語釋乎

嘉慶二十四年小寒日阮元書於贛州舟次

語詞之釋肇於爾雅粵于爲曰茲斯爲此每有爲雖誰昔爲昔若斯之類皆約舉一隅以待三隅之反蓋古今異語別國方言類多助語之文凡其散見於經傳者皆可比例而知觸類長之斯善式古訓者也自漢以來說經者宗尙雅訓凡實義所在旣明箸之矣而語詞之例則略而不究或即以實義釋之遂使其文扞格而意亦不明如由用也猷道也而又爲詞之於若皆以用與道釋之則尙書之別求聞由古先哲王大誥猷爾多邦皆文義不安矣

此舉一以例其攸餘後皆放此

所也迪蹈也而又爲詞之用若皆以所與蹈釋之則尙書之各迪有功豐水攸同毛詩之風雨攸除鳥鼠攸去皆文義不安矣不弗也丕大也而又爲發聲與承上之詞若皆以弗與大釋之則尙書之三危旣宅三苗丕敍我生不有命在天否則侮厥父母毛詩之否難知也有周不顯帝命不時禮記之不在此位也皆文義不安矣作爲也而又爲詞之始與及若皆以爲釋之則尙書之萬邦作乂作其卽位皆文義不安矣爲作也而又爲詞之如與有與與與於若

皆以作釋之則左傳之何臣之爲晉語之稱爲前世穀梁傳之近爲禰宮管子之爲臣死乎孟子之得之爲有財皆文義不安矣又如如若也而又爲詞之而與乃與當與與若如也而又爲詞之其與而與此與惟曰言也而又爲詞之昧謂言也而又爲詞之爲與與與如與柰云言也而又爲詞之有與或與然寧安也而又爲詞之乃能善也而又爲詞之而與乃無不有也而又爲詞之發聲與轉語有不無也而又爲詞之爲卽就也而又爲詞之則與若與或則法也及至也而又爲詞之若茲此也而又爲歎詞嗟歎詞也而又爲語助彼他也而又爲詞之匪匪非也而又爲詞之彼咫尺也而又爲詞之只允信也而又爲詞之用終盡也而又爲詞之旣多衆也而又爲詞之祇適徂逝皆往也而適又爲詞之啻徂又爲詞之及逝又爲詞之發聲思念也居處也夷平也一數之始也而又皆爲語助曷詞之何也而又爲何不盍何不也而又爲何於詞之于也而又爲爲爲與爰詞之曰也而又爲與安詞之焉也而又爲乃爲則爲於是焉詞之

安也而又爲於爲是爲於是爲乃爲則惟詞之獨也而又爲與爲及爲雖雖不定之詞也而又爲惟矧詞之況也而又爲亦亦承上之詞也而又爲語助且詞之更端也而又爲此之詞之是也而又爲於爲其爲與凡此者其爲古之語詞較然甚箸揆之本文而協驗之他卷而通雖舊說所無可以心知其意者也引之自庚戌歲入都侍大人質問經義始取尙書廿八篇紬繹之而見其詞之發句助句者昔人以實義釋之往往詰籀爲病竊嘗私爲之說而未敢定也及聞大人論毛詩終風且曩禮記此若義也諸條發明意旨渙若冰釋益復得所遵循奉爲楷式乃遂引而伸之以盡其義類自九經三傳及周秦西漢之書凡助語之文徧爲搜討分字編次以爲經傳釋詞十卷凡百六十字前前所未及者補之誤解者正之其易曉者則略而不論非敢舍舊說而尙新奇亦欲窺測古人之意以備學者之采擇云爾嘉慶三年二月一日高郵王引之敘

經傳釋詞第一

與

呂

猶

由

繇

因

用

允

於

于

經傳釋詞第二

爰

粵

曰

吹音聿

安

焉

爲

謂

經傳釋詞第三

惟

云

有

或

抑

一

亦

伊

夷

洪

庸

台音飾

經傳釋詞第四

惡音烏

俟

遐

號音豪

曷

盍

許

行

況

鄉音向

汔音迄

歟

邪以遮反

也

矣

乎

俞

於音烏

猗

噫

嘻

吁

經傳釋詞第五

孔

今

羌

𪔐魚覲反

言

宜

可

幾

祈

豈

蓋

厥

及

其

其音記

其音姬

居

詎

固

故

顧

苟

皋

經傳釋詞第六

乃

寧

能

徒

獨

柰

那

都

當

儻

殆

誕

迪

直

疇

經傳釋詞第七

而

如

若

然

尔今作爾

耳

仍

聊

來

經傳釋詞第八

雖

肆

自

茲

斯

些

思

將

且

且子餘反

徂

作

曾

曾音層

殤音慘

哉

載

則

卽

啗音茲

善今作嗟

咎音案

經傳釋詞弟九

終

誰

孰

者

諸

之

旃

是

時

寔

只

管

祇音支

適

識

屬音燭

止

所

矧

爽

庶

尙

逝

率

式

經傳釋詞第十

彼

末

蔑

比

薄

每

不

非

匪

無

罔

微

勿

夫
音扶

經傳釋詞目錄終

經傳釋詞第一

高郵王引之著

與

鄭注禮記檀弓曰與及也常語也

與猶以也易繫辭傳曰是故可與酬酢可與祐神矣言可以酬酢可以祐神也

禮記檀弓曰殷人殯於兩楹之間則與賓主夾之也言以賓主夾之也玉藻曰

大夫有所往必與公士爲賓也言必以公士爲賓也義見上文中庸曰知遠之近知

風之自知微之顯可與入德矣言可以入德也論語陽貨篇曰鄙夫可與事君

也與哉言不可以事君也孔傳曰言不可與事君皇疏曰言凡鄙之人不可與

事君之故非謂不可與鄙夫事君也後漢書李法傳法上疏諫坐失旨免爲庶人還鄉里人問其不合上意之由法未嘗應對固問之法曰鄙夫可與事君乎

哉苟患失之無所不至法之言如此是不說人以無罪而以鄙夫自貶且自謂其不可以事君也然則法之意亦謂鄙夫不可以事君非謂不可與鄙夫事君

明矣顏師古匡謬正俗曰孔子曰鄙夫可以事君變與言以正與經旨相合史記袁盎

傳曰妾主豈可與同坐哉言不可以同坐也漢書與貨殖傳曰智不足與權變

勇不足以決斷仁不能以取予漢書楊雄傳曰建道德以爲師友仁義與爲朋

文選羽獵賦與下有之字乃後人不曉文義而妄加之與亦以也互文耳

家大人曰與猶爲也此爲字讀平聲韓子外儲說左篇曰名與多與之其實少言名爲

多與之而其實少也西周策曰秦與天下罷則令不橫行於周矣言秦爲天下

所疲也今本作秦與天下俱罷俱字乃後人不曉文義而妄加之辯見讀書雜誌秦策曰吳王夫差棲越於會稽勝

齊於艾陵遂與句踐禽死於干隧言爲句踐所禽也

家大人曰與猶爲也此爲字讀去聲孟子離婁篇曰所欲與之聚之言民之所欲則爲

民聚之也秦策曰或與中期說秦王曰鮑本如是姚本與作爲言爲中期說秦王也楚策

曰秦王令芊戊告楚曰毋與齊東國吾與子出兵矣言吾爲子出兵也又漢書

高祖紀漢王爲義帝發喪漢紀爲作與

家大人曰與猶謂也大戴禮夏小正傳曰獺獸祭魚其必與之獸何也曰非其

類也與之獸謂之獸也來降燕乃踴室今本脫室字據傳文補其與之室何也操泥而就

家入人內也與之室謂之室也曾子事父母篇曰夫禮大之由也不與小之自
也不非也與謂也言禮在由其大者非謂由其小者而已也李善本文選報任
少卿書曰假令僕伏法受誅若九牛亡一毛與螻蟻何以異而世又不與能死
節者言世人不謂我能死節也

漢書司馬遷傳作不與能死節者比五臣本文選作不能與死節者次比皆後人不曉文義而

妄加增改辯
見讀書雜誌

廣雅曰與如也大戴禮四代篇曰事必與食食必與位無相越踰與如也言事
必如其食食必如其位也晏子春秋問篇曰正行則民道曲行則道廢正行而
遺民乎與持民而遺道乎與亦如也言將正行而遺民乎如其持民而遺道乎
也墨子兼愛篇曰若大國之攻小國也大家之亂小家也強之劫弱衆之暴寡
詐之謀愚貴之敖賤此天下之害也又與爲人君者之不惠也臣者之不忠也
父者之不慈也子者之不孝也此又天下之害也又與今人之賤人執其兵刃
毒藥水火以交相虧賊此又天下之害也又與猶又如也襄二十六年左傳引

夏書曰與其殺不辜寧失不經凡上言與其下言寧者放此禮記檀弓曰喪禮與其哀不足

而禮有餘也不若禮不足而哀有餘也祭禮與其敬不足而禮有餘也不若禮

不足而敬有餘也凡上言與其下言不若者放此與其皆謂如其也或但謂之與晉語曰與余

以狂疾賞也宋本如是今本作是以狂疾賞也乃後人不曉文義而妄改之不如亡孟子萬章篇曰與我處畎

畝之中由是以樂堯舜之道吾豈若便是君為堯舜之君哉吾豈若便是民為

堯舜之民哉呂氏春秋貴直篇曰與吾得革車千乘也不如聞行人燭過之一

言史記魯仲連傳曰吾與富貴而詘於人甯貧賤而輕世肆志焉是也閔元年

左傳曰猶有令名與其及也王肅注曰雖去猶有令名何與其坐而及禍也見史

記晉世家集解又後漢書荀爽傳曰截趾適屨孰云其愚何與斯人追欲喪軀何與猶何如也二年傳曰與其危身

以速罪也晉語作况其危身於狄以起讒於內也况比也比亦如也杜注曰言孰與危身以召罪孰與猶何

如也秦策曰秦昭王謂左右曰今日韓魏孰與始強對曰弗如也王曰今之如

耳魏齊孰與孟嘗芒耶之賢對曰弗如也齊策曰田侯召大臣而謀曰救趙孰

與勿救起策曰趙王與樓緩計之曰與秦城何如不與今本不與下又有何如二字乃後人不曉文義而妄加之辯見讀書雜誌是孰與卽何如也故司馬相如子虛賦楚王之獵孰與寡人乎郭璞注曰與猶如也

與語助也僖二十三年左傳曰夫有大功而無貴仕其人能靖者與有幾言能

靖者有幾也與語助也與有幾三字連讀釋文曰其人能靖者與音餘絕句失之襄二十九年曰是盟也其與幾

何又昭元年曰主民翫歲而謁曰其與幾何又曰叔向問子皙於行人揮對曰其與幾何又晉語曰雖謂之挾而猶以齒牙口弗堪也其與幾何又曰邵子曰民生於地上寓也其與幾何吳語言其幾何也周語曰若壅其口其與能幾何

言能幾何也章注與辭也晉語曰諸臣之委室而徒退者將與幾人言將幾人也章注

與辭也又昭十七年左傳曰其居火也久矣其與不然乎言其不然乎也周語曰

余一人其流辟於裔土何辭之與有言何辭之有也晉語曰亡人何國之與有

言何國之有也越語曰如寡人者安與知恥言安知恥也又孟子滕文公篇曰

不由其道而往者與鑽穴隙之類也與字皆是語助無意義也

呂以已

呂或作以或作已鄭注禮記檀弓曰以與已字本同

以語詞之用也書堯典曰以親九族是也常語也

漢書劉向傳注曰呂由也大戴禮子張問入官篇曰忿數者獄之所由生也距諫者慮之所以塞也以亦由也此亦常語

玉篇曰以爲也詩瞻卬曰天何以刺言天何爲刺也凡經傳言何以若此者皆謂何爲若此也亦常語

以猶謂也禮記檀弓曰昔者吾有斯子也吾以將爲賢人也言吾謂將爲賢人

也昭二十五年左傳曰公以告臧孫臧孫以難告郈孫郈孫以可勸釋文曰郈孫以可絕

句勸勸公逐季氏也言臧孫謂難郈孫謂可也齊策曰臣之妻私臣臣之妾畏臣臣之客

欲有求於臣皆以美於徐公言皆謂美於徐公也

廣雅曰以與也書般庚曰爾忱不屬惟胥以沈某氏傳曰相與沈溺詩江有汜